

**Kalaallit Nunaanni annaassiniarnissamut upalungaarsimaneq aamma ikuallattoornissamik qaartoornissamillu pitsaaliuinermi iliuusissat pillugit Inatsisartut inatsisissaattut siunnersuut**

(Ineqarnermut, Attaveqarnermut Angallannernullu Naalakkersuisoq)

**Saqqummiussissut  
Siullermeerneqarnera**

Matumuuna Kalaallit Nunaanni annaassiniarnissamut upalungaarsimaneq aamma ikuallattoornissamik qaartoornissamillu pitsaaliuinermi iliuusissat pillugit Inatsisartut inatsisissaattut siunnersuut Naalakkersuisut sinnerlugit saqqummiuppara.

Inatsisissatut siunnersuutip atuutilerneratigut ikuallattoornermut inatsit maannakkut atuuttoq Kalaallit Nunaanni annaassiniarnissamut upalungaarsimaneq aamma ikuallattoornissamik qaartoornissamillu pitsaaliuinermi iliuusissat pillugit Inatsisartut inatsisaannik taarserneqassaaq.

Siunnersuummi annaassiniarnissamut upalungaarsimanermi kiisalu annaassiniarnissamut upalungaarsimasut pilersarusiornissaannut ilusilersornissaannullu killissarititaasut suliaassallu aalajangersarneqarput. Qatserisartoqarfiit maannakkut atuuttut siunissami annaassiniarnissanut upalungaarsimasunut ilaalissapput. Ikuallattoornissamik pinaveersaartitsinermit akiuiniarnermullu aalajangersakkat siunnersuummi ingerlateqqinneqarput.

Suliaassaqarfikkuutaartumik akisussaaffeqarneq siunnersuummi inatsisitigut aalajangersarneqarpoq. Suliaassaqarfikkuutaartumik akisussaaffeqarnermut tunngaviusoq sullissisut akornanni suliaasanut akisussaaffinnik agguataarinermi tunngaviuussaaq. Suliaassaqarfikkuutaartumik akisussaaffeqarneq isumaqarpoq oqartussaasut, suliffeqarfik sullissivilluunniit ulluinnarni suliaassaqarfimmuut aalajangersimasumut akisussaasuusoq aamma ajutoornernik pisoqarnerani ajunaarnersuaqarneranilu akisussaaffeqartoq. Tamatuma nassatarisaanik suliaassaqarfii tamarmik immikkut ulluinnarni suliat aallaavigalugit upalungaarsimanermut pilersarusiorfigineqassapput.

Kiisalu siunnersuutip atuutilernerani upalungaarsimanermut ataatsimiititaliaq pilersinneqartoq inatsisitigut aalajangersaaffigineqassaaq.

Upalungaarsimanermut Naalakkersuisoq pilersarusiornerup oqartussaasunit allanit isumagineqartussaannngitsortaani pilersarusiornermik ataqatigiissaarisuussaaq pilersarusiussallunilu. Tamatumattaq nassatarisaanik upalungaarsimanermut ataatsimiititaliap atuunneranut tunngasunik pingaarnernik ataqatigiissaarisuussaaq.

Taamatut oqaaseqarlunga Kalaallit Nunaanni annaassiniarnissamut upalungaarsimaneq aamma ikuallattoornissamik qaartoornissamillu pitsaaliuinermi iliuusissat pillugit Inatsisartut inatsisissaattut siunnersuut, Inatsisartuni kajumittumik suliaanngorlugu tunniuppara. Siunnersuut aappassanneerneqannginnermini Inatsisartut Attaveqatigiinnermut Ineqarnermullu Ataatsimiititaliami suliarineqassasoq siunnersuutigineqarpoq.